

23 FEB 2003

NAM-FONG/I

PERBAIKI PASARAN BURUH DAN SUMBER MANUSIA UNTUK KE HADAPAN, KATA FONG

PETALING JAYA, 23 Feb (Bernama) -- Menteri Sumber Manusia Datuk Dr Fong Chan Onn berkata keperluan pasaran buruh dan pembangunan sumber manusia (HRD) yang merupakan satu-satu cara untuk memudahkan hubungan perdagangan dan pelaburan di kalangan negara-negara Selatan-selatan perlu diperbaiki.

Aliran buruh yang efisien akan memberi kemudahan hubungan perdagangan dan pelaburan, katanya dalam kertas kerjanya yang bertajuk "Faktor Manusia dalam Mengeratkan Hubungan Perdagangan dan Pelaburan" pada Forum Perniagaan Pergerakan Negara-negara Berkecuali (NAM) mengenai Kerjasama Selatan-selatan di sini hari ini.

Dengan demikian, sistem yang sewajarnya bagi pengambilan pekerja di negara yang menghantar dan menerima buruh akan membolehkan pihak berkuasa masing-masing mengurangkan penyeludupan manusia dan mengambil pekerja asing yang mudah terdedah kepada eksploitasi dan manipulasi, kata Dr Fong.

"Beberapa bentuk penyelarasann, jika bukan penstandardan, diperlukan bagi memudahkan hubungan perdagangan dan pelaburan di kalangan negara-negara Selatan-selatan. Ini akan meningkatkan pergerakan buruh yang lebih meluas dan perkongsian maklumat dan pengalaman," katanya pada forum dua hari itu yang dirasmikan oleh Perdana Menteri Datuk Seri Dr Mahathir Mohamad hari ini.

Beliau berkata pembaikan dalam bidang-bidang seperti sistem pembayaran dua hala, prosedur kastam bagi eksport dan import serta perjanjian pencukaian berganda juga boleh meningkatkan hubungan ini.

Dr Fong berkata perbincangan mengenai bidang seperti pergerakan buruh dan kerjasama teknikal boleh diteruskan melalui perjanjian kerangka atau memorandum persefahaman yang masing-masing mempersetujuinya di negara-negara yang mengambil bahagian.

Selain itu, satu pangkalan data maklumat pasaran buruh yang menyeluruh dan tepat diperlukan bagi membentuk polisi-polisi buruh dan guna tenaga yang efektif.

Dalam kertasnya, Dr Fong menyatakan bahawa kekurangan tenaga pakar sebagai satu daripada masalah kritikal yang dihadapi oleh negara-negara Selatan yang menghalang negara miskin untuk menandingi dengan negara kaya.

Oleh itu, beliau berkata terdapat keperluan bagi kerjasama teknikal dan latihan diadakan dalam konteks negara-negara Selatan-selatan dengan memperluaskan program kerjasama teknikal sedia ada. -- BERNAMA

SHO FR NHD